

# কবি ও রাজনীতি

নুরুজ্জামান মানিক\*

অসাধারণ ইন্ডিয়ানুভুতি এবং গ্রহীতাশক্তির গুণে কিংবা নতুন উদ্ভাপ,অনুষঙ্গে,রূপে,রসে ,শব্দ ব্যবহারের নিপুনতায় কবি মানুষ হিসেবে অবশ্যই অসাধারণ। কিন্তু এটা অস্বীকার করা যাবে না যে, কবি অসাধারণ মানুষ হলেও তিনি একজন মানুষই সূতরাং তারও দোষগুণ থাকতে পারে। একিইভাবে একজন কবির যেমন তার সংসারের প্রতি দায়িত্ব থাকে ,তেমনি সামাজিক দায়িত্ব ও থাকে। আবার অনেক সময় রাজনৈতিক আদর্শের প্রতি দায়িত্ব থাকে।

কবি যেহেতু সমাজেরই একজন এবং তার নিজস্ব আবেগ,চিন্তা ,বিশ্বাস ও দৃষ্টিভঙ্গির কারণে সমকালিন দেশীয় ও আন্তর্জাতিক রাজনীতির দর্শণ,দল বা গোষ্ঠীর প্রতি আনুগত্য ও সমর্থনও বিচিত্র নয়।

কবি রবীন্দ্রনাথ(বঙ্গভঙ্গবিরোধী আন্দোলন) ,নজরুল(কমরেড মুজাফফর আহমেদের ভারতীয় কম্যুনিষ্ট পার্টি) ,সুভাস,সুকান্ত,সমর সেন,(মার্ক্সিস্ট) ফররুখ,(পাকিস্তান আন্দোলন ,ইসলাম পন্থী) হাসান হাফিজুর রাহমান(প্রগতিশীল রাজনীতি),শামসুর রাহমান /সৈয়দ শামসুল হক,(আওয়ামী লীগ সমর্থিত ধর্মনিরপেক্ষতা ও মৌলবাদ বিরোধী আন্দোলন ,আল মাহমুদ(পূর্বে জাসদ ,বর্তমানে জামায়াতে ইসলামীর রাজনীতি) ,আহমেদ ছফা(আমি দশ বছর বিপ্লবী রাজনীতি করেছি-ছফা), ফরহাদ মজহার (এক সময়ে বিপ্লবী রাজনীতি,বর্তমানে ভাব বাদ,মার্ক্সবাদ ও ইসলামী মৌলবাদের মিশেল ) প্রমুখ আনেক কবির রাজনৈতিক আদর্শ/দল/ গোষ্ঠীর কর্মকাণ্ডে সম্পৃক্ততা পরিলক্ষিত।

আনেকে ,আবার ক্ষমতাকেন্দ্রীক রাজনীতি করেন অর্থাৎ যে সরকার ক্ষমতায় থাকবে, তার সাথে সখ্যতা বজায় রাখা। এই খেত্রে সবচেয়ে সফল হলেন **কবি সৈয়দ আলী আহসান**। পাকিস্তানী আমলে তার সরকারসমর্থক ভূমিকার কথা না হয় বাদ দিলাম। বাংলাদেশের শাসকদের মধ্যে বিশেষত জেনারেল এরশাদের সাথে তার সখ্যতার জন্য তিনি সবচেয়ে বেশি সমালোচিত হন। এ ব্যাপারে স্বয়ং **কবি সৈয়দ আলী আহসানের** বক্তব্য প্রণিধানযোগ্য : ‘আমি বঙ্গবন্ধু শেখ মুজিবুর রহমানের আমলে উপাচার্য হয়েছিলাম। তিনিই আমাকে উপাচার্য করেছিলেন এবং সেই সময় আমি শিল্পকলা একাডেমির গঠনতন্ত্র তৈরি করি, বাংলা একাডেমি ও বাংলা ডেভলপমেন্ট বোর্ডের যে মিলিত গঠনতন্ত্র সেটা আমি করি। বঙ্গবন্ধুর নির্দেশেই আমি এই কমিটির চেয়ারম্যান ছিলাম এবং সে সময়কার শিক্ষার ব্যাপারে নানা বিষয়ে আমার পরামর্শ গ্রহণ করা হতো। কিন্তু কেউ তো আমাকে বলে না যে আমি বঙ্গবন্ধু শেখ মুজিবুর রহমানের দালাল ! আমি তো তার অত্যন্ত ঘনিষ্ঠ ছিলাম। দ্বিতীয় হচ্ছে ,জিয়াউর রাহমানের আমলে তো আমি তার মন্ত্রী সভায়ই স্থান নিয়েছিলাম। যখন আমি চ্যান্সেলর ছিলাম তখন আমি কাবিনেটে আসতাম মিটিংয়ে। আমার অত্যন্ত প্রতাপ ছিল তখন। কিন্তু আমাকে তো জিয়ার দালাল কেউ বলে না।

এরশাদের আমলে তো আমি মন্ত্রী ছিলাম না, আমি নিজে দুটো বিশ্ববিদ্যালয়ের ভাইস চ্যান্সেলর ,শিক্ষামন্ত্রী ছিলাম-এরশাদের সময় আমি মঞ্জুরী কমিশনের চেয়ারম্যান ছিলাম-দুটো বিশ্ববিদ্যালয়ের যে এক সময় ভাইস চ্যান্সেলর থাকে এবং যে এক সময় শিক্ষামন্ত্রী

থাকে মঞ্জুরী কমিশনের চেয়ারম্যান হবার অঙ্গীকার তো তার আছেই ! এবং অত্যন্ত বলিষ্ঠভাবে আছে! শুধু এরশাদের সময় এই নিয়োগটা হয়েছিল বলে আমি এরশাদের দালাল এতো হতে পারে না। এরশাদের সময় তো অনেকের নিয়োগ হয়েছে -নিয়োগ তো একেকজনের সময় হবেই-সেই কারণে সে তার দালাল হয়ে যাবে এরকম আজগুবী কথা তো পৃথিবীতে কেউ বলে না।

দ্বিতীয় ,আমি জাতীয় অধ্যাপক হয়েছি সেই সময়ে। প্রায় সব জাতীয় অধ্যাপকই এরশাদের আমলে হয়েছে-নয় বছর ছিল তো-সুতরাং তার সময়ে তো হবেই! ডাঃ ইব্রাহীম হয়েছেন, প্রফেসর নূরুল ইসলাম হয়েছেন, প্রফেসর শামসুল হক হয়েছেন, আমি হয়েছি। চারজনই এরশাদের আমলে। বাকি তিনজন সম্পর্কে বলা হয় না। আমার সম্পর্কে অনেকে বলে, এতো এরশাদ তাকে জাতীয় অধ্যাপক করে। কেন বলবে? আমার অধিকার তাদের অনেকের চেয়ে বেশী! বরঞ্চ আমার অনেক আগে হওয়া উচিত ছিল। (সূত্রঃ মুহাম্মদ নাসির উদ্দিন সম্পাদিত ‘নো-র’, অষ্টম সংখ্যা, ডিসেম্বর ১৯৯৫, চট্টগ্রাম)

### কবিতার রাজনীতিঃ

এতো গেল প্রচলিত/প্রথাগত রাজনীতির কথা। এর বাইরে কবিদের আরেক ধরনের রাজনীতি করতে হয়। অবশ্য, শুধু কবি নয়, শিল্প-সাহিত্যের সকলকেই সাফল্যের জন্য এই রাজনীতি কমবেশী করতে হয়। এই রাজনীতিটা না করলে /করতে ব্যর্থ হলে একজনের যত ভাল অভিনয় জানা থাকুক বা প্রতিভা থাকুক, টিভিতে (তা সে সরকারী হোক আর বেসরকারী হোক) চ্যান্স পাবে না কিনবা চ্যান্স পাইলেও টিকবে না। ফিল্ম, মডেলিং, নৃত্য, মঞ্চ সব জায়গাতেই এই রাজনীতি। একি কারণে মিডিয়াতেও পাত্তা পাওয়া যাবে না। আজ যারা শীর্ষস্থানীয় ‘তারকা’ হয়েছেন তা এই মিডিয়া’র কল্যাণে। আর মিডিয়ার আনুকূল্য পাবার জন্য কি কি তরিকা লাগে তা অনেকটা ওপেন সিক্রেট।

যাক সে সব কথা। আমরা বরং কবি হুমায়ূন আজাদ এর কাছ থেকে শুনি ‘কবিতার রাজনীতি’ এর কথাঃ ‘কবিতা লেখা এখন আর নিষ্ক্রিয় নিঃশব্দ ধ্যানচর্চা নয়, তা এখন সক্রিয় শোরগোলয় রাজনীতিচর্চা। কবিকে এখন আর শুধু কবিতা লিখলে চলে না, যোগ দিতে হয় কবিতা-রাজনীতিতে। রাজনীতিতে যতো সফল হবেন, খ্যাতি আসবে ততো বেশী। এর জন্যে প্রচার অভিযান চালাতে হয় নিপুনভাবে, দখল করতে হয় প্রচারের সমস্ত মাধ্যম। যিনি শুধুই কবিতা লিখবেন কিন্তু কোনো প্রচার অভিযান চালাবেন না, তাকে মহাকালের অপেক্ষায় থাকতে হবে; আর যিনি একটি কবিতা লিখে দশটি অভিযান চালাবেন, সমকাল তারই গুনগান গাইবে। প্রচার ভালভাবে চালানোর জন্যে দরকার হয় দল, কেননা একমাত্র দলের সাহায্যে আধুনিক প্রতিভারা প্রতিষ্ঠা পেতে পারেন। তরুন কবিযশোপ্রার্থীরা জড়ো হয় এসব দলে। দলেভুক্ত হলে কবিতা ছাপানো সহজ হয়। চল্লিশ-পঞ্চাশ টাকা পাওয়া যায়,— ‘ওস্তাদ’ খুশি হলে ছবিও ছাপা হয়। প্রভাবশালী ওস্তাদের চেলাসংখার ওপর নির্ভর করে ওস্তাদের কৌলিন্য। ওস্তাদ-আশ্রিত কবিদলগুলোর মধ্যে বোঝাপড়াও থাকে বেশ। যদিও নামে-বেনামে এক ওস্তাদ অন্য ওস্তাদের বিরুদ্ধে তরুন লড়াকুদের খেপিয়ে দেয়। অনুসারীদের ওপর কড়া চোখ রাখা হয়, বিনয়ের অভাব ঘটলে বহিষ্কার করা দল থেকে। ওস্তাদের প্রশংসা করতে হয় সবসময় ও সবখানে। যে তরুন সব খানেই অবিনয়ী, ওস্তাদের কাছে সেও ভীষন বিনয়ী হয়ে পড়ে, পা ছুয়ে সালাম করে। প্রচারের বেলা তারা শুধু বিচত্রগামী নন, সর্বত্রগামী। অন্তত একটি ক্ষেত্রে রবীন্দ্রব্যর্থতার ঘাটতি পূরণ হয়েছে এখানেঃ দৈনিক -সাপ্তাহিক-সিনেমা পত্রিকা থেকে নিয়মিত-অনিয়মিত সংকলন, বেতার -টেলিভিশন অর্থাৎ সর্বত্র তারা প্রচারহানা দেন। এরা নিজেরা পত্রিকা বের করে দল করে, পত্রিকা বন্ধ হলে অন্যের ওপর ভর করে।

কবিতা রাজনীতি এদেশে ন তুন নয়, অনেকদিন ধরে চলে আসছে। রাজনীতির মূলে কেবল অবাস্তব খ্যাতিলিপ্সা নেই, আছে বাস্তব লোভ। আমাদের দেশে তরুন কবিকে স্নেহমেশানো উপহাসের চোখে দেখা হয়, কিন্তু প্রতিষ্ঠার পরে তার বৈষয়িক উন্নতিও কম ঘটে না। ওই উন্নতির জন্যই রাজনীতি; অমরতার জন্যে রাজনীতির দরকার হয় না। খ্যাতিবাদে যা থাকে তা হচ্ছে পুরস্কার, অর্থ, উপাধি ইত্যাদি। যেমন, বা-লা একাডেমির পুরস্কারের রাজনীতিতে হেরে গিয়েছিলেন জসীম উদ্দীন, জিতেছিলেন ফররুখ আহমদ; তাই জসীম উদ্দীন আর বা-লা একাডেমির পুরস্কার নেননি। সৈয়দ আলী আহসান যখন বুঝতে পারলেন তিনি কিছুতেই সেরা কবির শিরোপা পাবেন না, তখন দাড় করালেন আল মাহমুদকে শামসুর রাহমানের প্রতিপক্ষরূপে। সে সময়ে কবি মহলের গুজবঃ অসহায় আল মাহমুদ বড়ো আশ্রয়ে বা-লা একাডেমির পুরস্কার পেলেন শামসুর রাহমানের আগে। (সূত্রঃ কবির লড়াই, হুমায়ূন আজাদ, সাপ্তাহিক বিচিত্রা, ২০ মার্চ ১৯৮১)

আমরাও দেখেছি, ৮০'র দশকে কবিকণ্ঠ ও পদাবলির লড়াই, কবিতা পরিষদে নেতৃত্বের দ্বন্দ্ব, রুদ্দ মুহম্মদ শহীদুল্লাহকে বহিষ্কার, কবিতাকেন্দ্র এর মাধ্যমে জেনারেল এরশাদকে কবি হিসেবে স্বীকৃতি আরো কতকি।

রচনাকালঃ নভেম্বর ৬, ২০০৬।

\*নুরুজ্জামান মানিকঃ ফ্রীল্যান্স সাংবাদিক, কলামিস্ট, প্রাবন্ধিক। প্রায় ১৫/১৬ বছর যাবত বাংলাদেশের প্রথম শ্রেণীর দৈনিকগুলিতে লেখালেখি করছেন। তবে সেগুলি প্রতিবেদন, ফিচার, কলাম/ নিবন্ধ ও প্রবন্ধ সাহিত্যধর্মী রচনা বলা চলে শূন্যের কোঠায়। অবশ্য, কিছু লেখা কে ‘সাহিত্যধর্মী রচনা’ বলে জোর করে চালানো যেতে পারে। যেমন, চিকিৎসা সেবায় রবীন্দ্রনাথ (ইত্তেফাক, এপ্রিল ২৮, ২০০০) রবিঠাকুরের শিলায়দহ (জনকণ্ঠ, মে ১৭, ২০০০) ব্রেস্ট (ইত্তেফাক, সেপ্টেম্বর ২২, ২০০০), কালজয়ী নাট্যকার ইবসেন (ঐ, অক্টোবর ২৪, ২০০০) আগাথা ক্রিস্টি (ঐ, জানু ১৬, ২০০১), স্বজন সমালচকগণ (যুগান্তর, জুলাই ১১, ২০০১), কমল মমিন, ক্যানসার এবং (ঐ, নভেম্বর ১৪, ২০০১), কবিগুরুর রঙ্গরসিকতা (জনকণ্ঠ, মে ৬, ২০০৫ এবং মে ৫, ২০০৬), শিমুল আজাদের কবি, সমাজ এবং সভ্যতা (সমকাল, এপ্রিল ২১, ২০০৬) ইত্যাদি।